

Թալինի Ս. Աստվածածին եկեղեցին վերաբացվել է 1989 թվականին և մեկ տարվա ընթացքում ենթարկվել է հիմնական նորոգության: Նորոգման աշխատանքները և ծախսերը ամբողջությամբ կատարվել է շրջանի բնակչության նախաձեռնությամբ և անմիջական մասնակցությամբ տեղի ավանային ղեկավարության: Կատարված է մեծ և շնորհակալ աշխատանք:

Թալինի Ս. Աստվածածին եկեղեցու հոգևոր հովիվ է նշանակվել ճեմարանավարտ Տ. Մյուռոն քահանա Ադամյանը: Հետ այսու Ս. Աստվածածին եկեղեցին իր արժանի տեղը և դերը պիտի ունենա շրջանի ժողովրդի հոգևոր կյանքում:

### ԵՐԿՐԱՇԱՐԺԻ ԵՐԿՐՈՐԴ ՏԱՐԵԼԻՑ

Երկու տարի անցավ այն չարաբաստիկ օրից, երբ երկրաշարժի ահավոր հարվածից ավերվեցին մեր պատմական Ծիրակի և Լոռվա աշխարհի շենքերը, գյուղերն ու քաղաքները և զոհվեցին ավելի քան 25 հազար հոգի:

Այս տարի ևս Հայ Եկեղեցին պատշաճ հանդիսավորությամբ նշեց հայ բյուրավոր զոհերի հիշատակը: Դեկտեմբեր 7-ին, ուրբաթ օրը, հնչեցին Ս. Էջմիածնի Մայր տաճարի և Հայաստանի բոլոր եկեղեցիների ու վանքերի զանգակները, մատուցվեցին ս. պատարագներ և կատարվեցին հոգեհանգրստյան արարողություններ:

Դեկտեմբերի 8-ին, շաբաթ օրը, Երևանի Հայհամերգի մեծ դահլիճում տեղի ունեցավ սգո համերգ՝ մասնակցությամբ հայրենի արվեստագետների: Ներկա էին Վեհափառ Հայրապետը և Մայր Աթոռի միաբանությունը: Այս առթիվ դահլիճի բեմի վրա կատարվեց հոգեհանգրստյան արարողություն՝ մասնակցությամբ Մայր Աթոռի երիտասարդ միաբանների: Մխիթարական խոսքով հանդես եկավ Տ. Ծնորհք արդ. Բաղդասարյանը:

Դեկտեմբերի 9-ին, կիրակի օրը, դարձյալ ս. պատարագներ մատուցվեցին և հոգեհանգրստյան արարողություններ կատարվեցին հայոց բոլոր եկեղեցիներում: Մայր տաճարում ս. պատարագ մատուցեց Տ. Նաթան վրդ. Հովհաննիսյանը, իսկ քարոզեց Մայր Աթոռի դիվանապետ Տ. Ներսես արքեպս. Պողոսյանը:

### ԵՐԿՐԱՇԱՐԺԻ ՏԱՐԵԼԻՑԸ ԾԻՐԱԿԻ ԹԵՄՈՒՄ

1988 թ. երկրաշարժի զոհերի երկրորդ տարելիցի առթիվ սույն թվականի դեկտեմբերի 7-ին մատուցվեցին ս. պատարագներ և կատարվեցին հոգեհանգրստյան արարողություններ Ծիրակի թեմի բոլոր եկեղեցիներում: Ի մասնավորի Կումայրի քաղաքում, կենտրոնական հրապարակի վրա, Ս. Ամենափրկիչ եկեղեցու ավերակների առջև բարձրացված հատուկ բեմահարթակի վրա պատարագեց և քարոզեց Ծիրակի թեմի առաջնորդ Տ. Գրիգորիս եպս. Բունիաթյանը, մասնակցությամբ քաղաքի ողջ եկեղեցական դասի: Պատարագին ներկա էին Հայաստանի Հանրապետության Գերագույն խորհրդի նախագահության անդամներ և պատգամավորներ, Կումայրիի ողջ ղեկավարությունը, Հանրապետության և Կումայրի քաղաքի հասարակայնության ներկայացուցիչներ, ինչպես նաև բազմահազար ժողովուրդ: Հավարտ ս. պա-

տարագի քաղաքի նոր գերեզմանատանը զետեղվեց ծաղկեպսակ, անհայտ զոհերի Խաչքար-հուշարձանի առջև:

Կիրովական քաղաքում, Ս. Գրիգոր Լուսավորիչ եկեղեցում, պատարագեց և քարոզեց Մայր Աթոռից հատուկ ժամանած Ս. Հռիփսիմե վանքի վանահայր Տ. Անանիա եպս. Արաքսյանը: Հավարտ ա. պատարագի ծաղկեպսակ զետեղվեց երկրաշարժի զոհերի հուշարձանի առջև, որից հետո սրբազան հայրը այցելեց քաղաքի հոգեբանական հատուկ դպրոցի աշակերտներին և մխիթարեց նրանց:

Սպիտակում ա. պատարագ մատուցեց և քարոզեց Մայր Աթոռից ժամանած Տ. Սերովբե վրդ. Իսախանյանը: Ս. պատարագից հետո ծաղկեպսակ զետեղվեց զոհերի հուշարձանի առջև: Ապա հոգեշնորհ հայր սուրբը քաղաքամերձ Լեռնավան և Շենավան գյուղերում բացումը կատարեց և օրհնեց նոր քանդակված խաչքարերի:

Ստեփանավանի Ս. Սարգիս եկեղեցում ա. պատարագ մատուցեց և քարոզեց տեղի հոգևոր հովիվ Տ. Եղիա քահանան:

### ՍՅՈՒՆՅԱՅ ԹԵՄՈՒՄ

Սյունյաց թեմի առաջնորդ Տ. Ասողիկ եպս. Արիստակեսյանի հրավերով Սյունիք այցելեցին Մայր Աթոռի Քրիստոնեական Քարոզչության Կենտրոնի անդամները՝ մասնակցելու համար եկեղեցուն կից կիրակնօրյա դպրոցի բացման արարողությանը և մի շարք այլ հանդիսությունների: Այս առթիվ ուխտագնացություններ կազմակերպվեցին դեպի Գլաձորի, Նորավանքի, Սիսվանի, Տաթևի և Սուրբ Խաչ վանքերն ու եկեղեցիները:

Դեկտեմբերի 8-ին, շաբաթ օրը, Գորիսի գիշերօթիկ դպրոցում տեղի ունեցավ հավաքական մկրտություն: Մկրտվեցին ավելի քան 200 աշակերտներ, մեծ թվով ուսուցիչներ և ծնողներ: Թեմի առաջնորդ Տ. Ասողիկ եպս. Արիստակեսյանը հանդես եկավ հավուր պատշաճի խոսքով՝ վեր հանելով մկրտության խորհուրդի իմաստն ու կարևորությունը:

Դեկտեմբերի 9-ին, կիրակի օրը, տեղի ունեցավ հոգեհանգստյան հանդիսավոր պաշտոն երկրաշարժի զոհերի հիշատակին նվիրված հուշահամալիրում՝ նախագահությամբ թեմակալ առաջնորդի: Սրտի խոսքով հանդես եկավ Տ. Աբել աղբ. Օղլությանը:

Նույն օրը, կեսօրվա ժամը 3-ին, տեղի ունեցավ եկեղեցուն կից Ս. Գրիգոր Տաթևացու անվան կիրակնօրյա դպրոցի բացումը: Ներկա էին քաղաքի մտավորական ներկայացուցիչներ, բազմաթիվ ուսուցիչներ: Բացման խոսքով հանդես եկավ Տ. Ասողիկ եպս. Արիստակեսյանը, վեր հանելով Գորիսում կիրակնօրյա դպրոց հիմնելու կարևորությունը: Այնուհետև Հայ Եկեղեցու դերի ու նշանակության մասին խոսեցին Տ. Սեպուհ ծ. վարդապետն ու Տ. Աբել և Տ. Շնորհք աբեղաները: Աշակերտների հետ տեղի ունեցավ մտերմիկ զրույց: Վերջավորության աշակերտները սովորեցին իրենց առաջին դասը՝ «Հայր մեր»-ը, որի խմբովին արտասանությամբ էլ վերջացավ օրվա հանդիսությունը: